

Das ander Capittel.

Wo man den Triangel so mit A. B. C vnd die
Regel D. E. verzeichnet in der Figur
zurichten sol.

Wenter/ welcher lust hette ein geschmeidig Instrument zu
haben / das er es auff ein Wehr oder Dolchen oder sunst
bey sich tragen wolt / der beschaw das beweglich Win-
ckelmäß mit sampt der Regel / so verzeichnet ist mit den Buchsta-
ben A B C. vnd die Regel mit dem absähen D. mach die stand Re-
gel / so mit AB. verzeichnet ist / vngesfahr eines halben Schuchs
lang / vnd die ander Regel A C. eines Schuchs lang oder lenger /
wenter mach noch ein Regel vnd zwey absähen darauff / das man
sy könn nider legen / mach die Stand Regel vnd die ander Regel
in ein anderen mit einer Strauben / das man es vest strauben könn
ne / das es sich nicht leychtlich lasse verrucken / demnach theil die
Standregel / von dem A. zu dem B. in 100. gleyche theil vñ mach
löchli von 5. zu 5. dareyn / oder ein rückerlein mit einem löchli / vnd
theil sy auß wie hie vor geschriben ist / mit solchem Triangel oder
beweglichem Winckelmäß kan man bey zweyen Stenden an ein
ort eigentlich vnd gewuß mässen alle höche / wente vnd tieffe / weñ
es ordenlich vnd gewuß gemacht vnd außgetheilt wirt / man mag
ouch söllliche Instrument klein oder groß machen / wie es dann ei-
nem jeden gefellig ist / doch je grösser es gemacht wirt / je gewüsser
es ist. Wellicher sölllicher Instrumenten eins begert von Mös-
sing gemacht / verguldt oder vnverguldt / auch ein nüt gefunden
Instrument darmit Sonnen Uhren zu reissen / vnd den Propor-
tional Circle / ouch andere Mechanische Instrument der findt sy
bey mir Leonhart Zubler Burger vnd Goldschmid in Zürich.

Das dritt Capittel.